

每週經課朗誦經文(巴克禮漢羅/教羅)2013/07/28

共同經課 - 1 何西亞書一章二節~十節

2 耶和華起頭對何西阿講 ê 話是 án-ni。耶和華對何西阿講，你 tiòh 去娶淫婦做 bó，也得 tiòh tù 淫亂所生 ê kiáⁿ；因為 chit-ê 地方大行淫亂，離開耶和華。3 Tùi án-ni，伊就去娶 Tek-láh-im ê cha-bó-kiáⁿ Ko-biát；婦人人懷孕，kā 伊生一個 kiáⁿ。4 耶和華對伊講，kā 伊名叫 Iá-su-liát；因為 koh tiap-á 久，我 beh 辦 Iá-hō ê 家 tī Iá-su-liát thâi 人流血 ê 罪，也 beh hō 以色列家 ê 國無去。5 到 hit 日，我 beh tī Iá-su-liát 平洋，at 折以色列 ê 弓。6 婦人人 koh 懷孕，生一個 cha-bó-kiáⁿ；耶和華對何西阿講，kā 伊號名 Lô-lō-hap-má，因為我無 beh koh 憐憫以色列家，決斷無赦免 in。7 總是我 beh 憐憫猶大家，用耶和華 in ê 上帝救 in，m̄ 是用弓，用刀，用交戰，用馬，kap 用馬兵來救 in。8 Lô-lō-hap-má 斷奶了後，婦人人 koh 懷孕，生一個 kiáⁿ。9 耶和華講，Tiòh kā 伊號名叫 Lô-a-bí；因為 lín m̄ 是我 ê 百姓，我也 m̄ 做 lín ê 上帝。10 總是以色列 ê 人額 beh 親像海沙，boē 量得，boē 算得；前 tī 甚麼所在對 in 講，Lín m̄ 是我 ê 百姓，將來 tī-hia beh 對 in 講，Lín 是永活上帝 ê kiáⁿ。

共同經課 - 2 詩篇八十五篇

1 Khó-láh ê 後裔 ê 詩；交 hō 樂官。1) 耶和華 ah，你已經施恩 tī 你 ê 地，雅各受掠 ê 人，你救伊 tò 來。2 你赦免你 ê 百姓 ê 罪惡，你遮蓋 in 一切 ê 罪過。[Sè-láh]3 你收回你一切 ê 受氣，Soah 你猛烈 ê 受氣。4 救阮 ê 上帝 ah，求你 hō 阮 tò-tng，Soah 你 òng 阮 ê 受氣。5 你 beh 受氣阮到永遠 mah？你 beh 將你 ê 受氣流到萬代 mah？6 你 kiám m̄ koh 將阮救活，Hō 你 ê 百姓因為你來歡喜 mah？7 耶和華 ah，求你 hō 阮看見你 ê 慈愛；Koh 將你 ê 救恩賞賜阮。8 我願聽全能 ê 耶和華所 beh 講 ê；因為伊 beh tù 伊 ê 百姓，kap 伊聖 ê 百姓，講平安；總是 in m̄-thang koh 去 lām-sám 行。9 伊 ê 救恩實在近 tī 驚畏伊 ê 人；Hō 榮光 tiàm tī 咱 ê 境內。10 慈愛 kap 真實相 tú-tiòh；公義 kap 平安相 chim 嘴。11 真實 tù 地裡發生，公義 tù 天看落來。12 耶和華 beh 賞賜好物，咱 ê 土地 beh 出伊 ê 土產。3 公義 beh 行 tī 伊 ê 頭前，Hō 伊 ê 腳跡成做 lō。

共同經課 - 3 歌羅西書二章六節~十五節，十六節~十九節

6 所以 lín 既然接納主基督耶穌，就 tiòh 照 án-ni tiàm-tī 伊來行，7 已經釘根 tī 伊，就直直受起造，tùi 信來堅固，照 lín 所 bat 受 ê 教示，滿滿感謝。8 Tiòh 謹慎，免得 hō 人用伊 ê 哲學 kap 空空 ê 無影話來迷惑 lín，照人 ê 遺傳，照世間 ê 小學，m̄ 是照基督。9 因為上帝性質 ê 豐盛 lóng 齊備 tiàm-tī 伊。10 Lín tiàm-tī 伊也得 tiòh 豐盛；伊是一切辦正事掌權 ê 頭。11 Tiàm-tī 伊 lín 也已經受割禮，m̄ 是用手來行 ê 割禮，就是基督 ê 割禮，thng 去肉體 ê 身軀；12 已經 tī 洗禮 kap 伊同埋葬，就 tī chit-ê 洗禮也 kap 伊同起來，是 tù 信上帝 ê 功用，就是 tù 死人中 hō 伊起來 ê。13 Koh lín 前為 tiòh 罪過 kap 肉體 ê 無割禮來死 ê，taⁿ 上帝 hō lín kap 基督同 koh 活，已經赦免咱 lóng 總 ê 罪過，14 擦消攻擊咱 chiah-ê 規例 ê 字樣，就是對敵咱 ê，釘伊 tī 十字架，來 tù 中間除伊；15 既然敗 hiah-ê 辦正事 ê，掌權 ê，就公行顯明 in，tī 十字架贏 in 來大悅。16 所以莫得因為所食所 lim ê，á 是為 tiòh 節期，初一，以及安歇日 ê 緣故，hō 人擬議；17 chiah-ê lóng 是將來 ê 事 ê 影，但是形就是基督 ê。18 莫得 hō 人搶 lín ê 報賞，in 故意謙卑敬拜天使，oá 靠 in 所有看見 ê，照 in 肉體 ê 心志 kan-ta teh phòng-hong，19 無連 tiâu tī hit-ê 頭，全身是 oá 靠 hit-ê 頭，tùi chiah-ê 節 kap 根得 tiòh 接應連絡，照上帝所賞賜 ê 長成來長成。

共同經課 - 4 路加福音十一章一節~十三節

1 耶穌 tī 一所在祈禱，已經 soah，伊 ê 學生一人對伊講，主 ah，教示阮祈禱，親像約翰也 bat 教示伊 ê 學生。2 伊就 kā in 講，Lín 祈禱 ê 時 tiòh 講，父 ah，願你 ê 名聖；你 ê 國臨到；3 阮 ê 日食日日 hō 阮；4 赦免阮 ê 罪，因為阮也赦免辜負阮 ê 人；莫得 chhoā 阮入 tī 試。5 Koh 對 in 講，Lín 甚麼人有朋友，你半暝去 chhē 伊，kā 伊講，朋友 ah，thèh 三個餅借我；6 因為我有朋友 tù 路裡來 chhē 我，我無物 thang 請伊 7 伊 tù 內面應講，莫得 chō-chak 我；門已經關，gín-ná kap 我 tī 床裡；我 boē 得 thang 起來 thèh hō 你。8 我 kā 你講，雖然無為 tiòh 伊做朋友起來 thèh hō 伊，iáu-kú 為 tiòh 伊 ê 迫切 beh 起來，照伊所欠用 ê hō 伊。9 我 koh kā lín 講，求就 hō lín；chhē 就 tú-tiòh；phah 門就 kā lín 開。10 因為見若求 ê 得 tiòh，chhē ê tú-tiòh；phah 門 ê Kā in 開。11 Lín tá-lòh 一個做父 ê，有 kiáⁿ 來討餅，kiám beh 將石頭 hō 伊 mah？á 是 beh 魚，kiám beh 將蛇準做魚 hō 伊 mah？12 á 是討卵，kiám beh 將蠍 á 蟲 hō 伊 mah？13 Lín chiah-ê 雖然 pháiⁿ，iáu-kú 會曉得用好物 hō lín ê Kiáⁿ 兒，何況 lín tī 天裡 ê 父，kiám 無用聖神來 hō 求伊 ê 人 mah？